

শ্রেষ্ঠ কিশোরগল্প

শ্রেষ্ঠ কিশোরগল্প

ধ্রুব এষ



শ্রেষ্ঠ কিশোরগল্প

ধ্রুব এষ

গ্রন্থস্বত্ব : লেখক

প্রথম প্রকাশ : ফেব্রুয়ারি ২০২৪

তাম্রলিপি : ৭৯৪

প্রকাশক

এ কে এম তারিকুল ইসলাম রনি

তাম্রলিপি

৩৮/৪ বাংলাবাজার, ঢাকা-১১০০

প্রচ্ছদ

ধ্রুব এষ

বর্ণবিন্যাস

তাম্রলিপি কম্পিউটার

মুদ্রণ

মা প্রিন্টিং প্রেস

১৮/২৩ গোপাল শাহ লেন, ঢাকা

মূল্য : ৩০০.০০

Srestho Kishoregolpo

By : Dhruba Esh

First Published : February 2024 by A K M Tariquul Islam Roni
Tamralipi, 38/4 Banglabazar, Dhaka-1100

Price : 300.00

\$10

ISBN : 978-984-98741-5-7

উৎসর্গ

সাগর ভাই
ফরিদুর রেজা সাগর
শ্রদ্ধাম্পদেষু

ভূমিকা

লেখার সময় যেমন মনে হয় না, লেখা হয়ে গেলেও তেমন মনে হয় না, আমার লেখা এই গল্পটা শ্রেষ্ঠ। তাহলে ‘শ্রেষ্ঠ কিশোরগল্প’ কেন? রেওয়াজ মাফিক। এধরনের সংকলনের চল আছে, হয়। আমার ‘শ্রেষ্ঠ কিশোরগল্প’ বাছাই করেছেন ‘কিশোর’ মঈন আহমেদ। কথাসাহিত্যিক মঈন আহমেদ, আমার বড় ভাই—কিশোরগল্প বাছতে গিয়ে কিশোর হয়ে গিয়েছিলেন। সতেরোটা গল্প বেছে দিয়েছেন। কৃতজ্ঞতা, ধন্যবাদ ইত্যাদি জানানোর সম্পর্ক আমাদের না। ভালো হোক সকলের।

ধ্রুব এষ

পুরানা পল্টন লাইন
ঢাকা।

সূচিপত্র

নীল মিয়ার ঈদের চান	১১
জিলাফ কী মানুস	১৬
বৃষ্টিপাগলি	২১
চন্দ্রবিন্দু মিঞার কাহিনি	৩০
পিসিমার বাঘ-পিসেমশাই	৩৪
গাছের ভাষা গাছের শিস	৩৮
জারুল গাছের বন্ধুরা	৪৩
হারুনের অঙ্কিত বাবা	৪৮
রাফ খাতা	৫৬
মনখারাপ গল্প	৮৯
দুখু মিয়া এবং রঞ্জু	৯৫
ভুতুড়ে ব্যাপার	১০২
জিরারফের দুঃখের কাহিনি	১০৬
রঙিনের জন্মদিনের ঘটনা	১০৯
নীল	১২১
পরি	১২৫
পৃথিবীর সেরা দৃশ্য	১৩৩

নীল মিয়ার ঈদের চান

চান দেখা যায়!

চান দেখা যায়!

পোলাপান চেল্লাচ্ছে। আগুনের লুকা আসমানে ছুড়ছে। খড় দিয়ে বানানো লুকা। আসমানের উঁচুতে উঠে ঝপুত করে মাটিতে পড়ছে। নিভে যাচ্ছে।

তল্লাটের সব পোলাপান। শামসু, হিরু, মিনার, আবু, সানা, বাটুল, শনাই, মন্টু। মিছিল দিচ্ছে তারা।

চান দেখা যায়!

চান দেখা যায়!

চাঁদ দেখা গেছে, কাল ঈদ। সন্ধ্যার অন্ধকারে পোলাপানের মিছিল আনন্দমুখর করে দিচ্ছে চরাচর। তারা যখন লুকা ছুড়ছে আলোর রোশনাই ফুটছে অন্ধকার আসমানে। আনন্দের রোশনাই। কাল ঈদ।

দূরে চলে যাচ্ছে মিছিল। আগুনের লুকা। নীল মিয়া দেখছে। আট বছর মতো বয়স। পোলাপানের হল্লার দলে থাকতে পারত কিন্তু পোলাপান তাকে নেয় না। মিছিলে নেয় না, খেলাধুলায় নেয় না। সানা বাটুল পল্টু ছাড়া কেউ কথাও বলে না পারতে। অথচ নীল মিয়ার মনে বড়ো সাধ, পোলাপান তাকে দলে নিক, কথা বলুক, তামাশা করুক। আহা! নীল মিয়ার ভাইটা যদি থাকত। লাল মিয়া। নীল মিয়ার জন্মের আগে সে নিউমোনিয়া হয়ে মরেছে। নীল মিয়ারও নিউমোনিয়া হয়েছিল। বেঁচে গেছে সে। খারাপ ধরনের বিমার নিউমোনিয়া। নীল মিয়ার মা সাকিনা বলে, 'তোরা বড়ো ভাই লাল মিয়া তোরা থেকেও ডাগরডাগর হইছিল রে বাপ।'

নীল মিয়া হাসে আর বলে, 'তুই মা তারে দেখছিস?'

'দেখব না? তোরে দেখি না?'

দেখে।

সাকিনা দেখে তার ছেলে নীল মিয়া বড়ো ভাই লাল মিয়ার মতো হয় নাই। নীল মিয়ার নাক বোঁচা। ডানহাতে লাল মিয়ার মতো আঙুল ছয়টা

না, পাঁচটাই। এই ছেলে মা-মুখী হয়ে জন্মেছে। লাল মিয়া ছিল তার বাপের মতো দেখতে।

পোলাপানের দল অপসৃত হয়েছে। আগুনের লুকা আর আকাশে উড়ছে না। আগুনের লুকা মানে আগুনের গোলা। খড় দিয়ে বলের মতো বানায়। আগুন ধরিয়ে আসমানে ছুড়ে দেয়। পোলাপান যদি দলে নিত তবে তাদের সঙ্গে নিশ্চয় লুকা ছুড়ত সাকিনার ছেলে নীল মিয়াও। হল্লা করত। কিন্তু এ মনে হয় কোনওদিন হবে না।

'নীল মিয়া রে। ও নীল মিয়া।' সাকিনা ডাকল।

নীল মিয়া বলল, 'মা।'

'চান উঠছে বাপ?'

'উঠছে মা।'

'তুই দেখছিস?'

'না।'

'ক্যান গো বাপ?'

'তোরে নিয়া দেখব।'

'আমি চান দেখব?'

'তুই মা সব দেখিস।'

সাকিনা হাসল, 'দেখি তো বাপ।'

'আয় দেখি।'

সাকিনা উঠল। গরিবের কুঁড়ে। দোরেই উঠান। কিছু নয়নতারার গাছ আর একটা আমলকি গাছ আছে। মা ছেলে উঠানে দাঁড়াল।

'কোনদিকে চান?' সাকিনা বলল।

'উইদিকে দেখ।' নীল মিয়া বলল।

সাকিনা দেখল? বলল, 'কী সোন্দর!'

'বাটুল শনাইরা আসমানে আগুনের লুকা ছুড়ে মারছে রে মা। মিছিল দিছে, চান উঠছে!'

'তোরে নেয় নাই?'

'কোনওদিন নেয়?'

কেন নেবে?

লাল মিয়া নীল মিয়ার বাপ কালা মিয়া। জেলে আছে গত আট মাস। চুফীকোনার গেরস্থ সালামত মোল্লার ঘরে সিঁদ দিয়ে ধরা পড়েছিল। কিছু চুরি

করতে পারে নাই। তাতে কী হলো? সালামত মোল্লার মুনিষরা ধরে থানায় দিয়েছে কালা চোরাকে। সালামত মোল্লা থানায় গিয়েছিলেন। কী কলকাঠি নেড়ে দিয়েছেন, জেল হয়ে গেছে কালা চোরার। সে কবে কোনদিন ছাড়া পাবে সাকিনা জানে না, নীল মিয়া জানে না। মা ছেলে কিছুই অপেক্ষাও করে না। একঘরে হয়ে তারা থাকে তল্লাটে। সাকিনাকে কেউ কাজ দেয় না, নীল মিয়াকে কেউ দলে নেয় না। তারা কি এটা নিয়ে দুঃখিত? না মোটে। নীল মিয়া জানে তার মা আছে, সাকিনা জানে তার ছেলে আছে। পৃথিবীর আর কিছু দরকার নাই তাদের।

পারতে ঘরে কুপি জ্বালায় না তারা। সন্ধ্যায় তো না-ই।

আমলকি গাছের তলায় উঠান অন্ধকার। একটা জোনাকি, দুইটা জোনাকি, তিনটা জোনাকি— জ্বলছে নিভছে, জ্বলছে নিভছে। ইস, দুইটা জোনাকি কি কোনওভাবে মায়ের চোখের ভেতর ঢুকে যেতে পারে না?

সাকিনা বলল, ‘ও নীল মিয়া।’

‘বল।’

‘খড় নাই উড়ানে? দেখ তো বাপ।’

‘খড় দিয়া কী করবি তুই?’

‘ল তো বাপ। দেখি কী করি?’

সাকিনা উঠানে বসল। খড়ের ছোট গাদা উঠানের কোনায়। কিছু খড় নিলো নীল মিয়া, ‘নে।’

খড় নিয়ে কী করল সাকিনা?

লুকা বানাল। গোল খড়ের বল।

‘নে বাপ। আগুন দিয়া উড়া।’

খুশি খুশি খুশি মহাখুশি নীল মিয়া। তার মায়ের মতো মা এই পৃথিবীতে নাই।

ঘর থেকে কুপি ধরিয়ে নিয়ে এল নীল মিয়া। আগুন ধরিয়ে লুকা ছুড়ে দিলো আসমানে। কী সুন্দর! কী সুন্দর! আগুন উড়ছে! আগুন উড়ছে!

তবে নীল মিয়া রোগাভোগা, তার কজির জোর কতটুকু আর? আগুনের লুকা বুপুত করে আবার তাদের এক টুকরো উঠানেই পড়ল। নিভে গেল।

হেমন্তের হিম পড়ে এর মধ্যে ভিজে গেছে চরাচর। তল্লাটের উত্তরে পাহাড়। সেই পাহাড় থেকে কনকনে উত্তরালী হাওয়া উড়ে আসছে, জুড়ে আসছে।

‘জার লাগে মা?’ নীল মিয়া বলল।

‘না বাপ, চান দেখ তুই।’

‘তুইও দেখ মা।’

নীল মিয়া চাঁদ দেখে। ঈদের চাঁদ। ঈদের আগের দিনের। সাকিনা দেখে? কী দেখে?

জন্মান্ত সাকিনা। চোখে দেখে না। তা না হলে কালা চোরার সঙ্গে বিয়ে হয় তার? বাপ নাই মা নাই অন্ধ একটা মেয়েকে ঘরে নেবে কে? কালা চোরা নিয়েছে। লাল মিয়া নীল মিয়া হয়েছে। লাল মিয়া থাকে নাই, নীল মিয়া আছে। এই ছেলেকে নিয়ে বাঁচে সাকিনা। লাল মিয়া কিরকম দেখতে ছিল বলে, চরাচর কিরকম দেখতে ছিল বলে, সারোকোনার হইলদা বিবির মোকামের মান্দার গাছ দুইটার কথা বলে। আর কদিন, গাছ দুটো ঝাঁ ঝাঁ লাল হয়ে যাবে। মান্দার ফুল ফুটবে ঝাঁপিয়ে।

‘তুই মা এত কী করে দেখিস?’

সাকিনা হাসে, ‘দেখি না বাপ, আল্লাহপাক দেখায় কত কী!’

‘কেমনে মা?’

এই কথার উত্তর সাকিনা দেয় না। তার জানা নাই সে কী করে দেখে! সব দেখে। ছেলে লাল মিয়াকে দেখত, ছেলে নীল মিয়াকে দেখে।

‘ঈদের চানের জার লাগে না মা?’

সাকিনা হাসে, ‘না—আ—আ।’

নীল মিয়া বাপের সিঁদকাঠি দেখেছে। সালামত মোল্লার ঘরের আওড় থেকে বাপ সিঁদকাঠি সমেত ধরা পড়েছিল। সেই সিঁদকাঠি এখন কোথায়? টাউনের থানায় জমা করা আছে? নাকি জেলে? নীল মিয়া টাউনে গেছে দুইবার। মায়ের সঙ্গে। জেলগেটে বাপকে দেখেছে। কালা চোরা হাসিমুখে ছেলেকে বলেছে, ‘ফিরি, তোরে সিঁদকাঠি ধরাব।’

মরি হায় হায় করে উঠেছিল সাকিনা, ‘ইয়া মাবুদ! ইয়া মাবুদ! এইসব কী বলেন আপনে! ইয়া মাবুদ। আমার ছেলে যান চোর না হয় মাবুদ!’

কালা চোরার হাসি কমে নাই, ‘তুই আন্ধা, আমি চোর। আমার ছেলে ডাক্তার এঞ্জিনিয়ার হইব? না কন্টেকদার? হা-হা-হা! হা-হা-হা!’

‘হাসেন ক্যান আপনে? ইয়া মাবুদ! ডাক্তার এঞ্জিনিয়ার কন্টেকদার চোর, আমার ছেলে কিছু হইব না।’

‘তোমার ছেলে? নীল মিয়া? কী বলে মাইনসে, কালা চোরার পুত্র না
আম্মা বেটির পুত্র? হ্যাঁ? হা-হা-হা!’

বাপ ঈদ করবে জেলে। ঈদের দিন জেলে ভালো খাবার দেয়। তারা কী
করবে? নীল মিয়া আর তার জন্মান্ন মা?

সামান্য চালের গুঁড়ি সঞ্চয় করে রেখেছে সাকিনা। চালের রুটি বানাবে
সকালে। আর গুড় আছে সামান্য। ঈদ হয়ে যাবে মা ছেলের।

সাকিনা বলল, ‘নীল মিয়া রে, ও নীল মিয়া?’

নীল মিয়া বলল, ‘উঁ?’

‘তোমার এত কী চিন্তা? বাপ? চান দেখ। তোমার টুপি লুঙ্গি ধুয়ে রাখছি
তো। শাটও। বিহানে ঘুম থেকে উঠে গোসল করে পাক সাফ হয়ে ঈদের
নামাজ পড়তে যাবি ঈদগায়।’

আট বছর বয়সের নীল মিয়া, বড়ো মানুষের মতো বুঝদারির বিষাদ
গলায় নিয়ে বলল, ‘আমি সিঁদকাঠি ধরব রে মা।’

বুক ফেটে গেল বুঝি সাকিনার, ‘ও আল্লাহ গো! ইয়া মাবুদ! ও আল্লাহ!
ও আল্লাহ! নীল মিয়া, ও নীল মিয়া, এইটা তুমি কী বললি রে বাপ? ও
বাপ! ও বাপ! চোর হইবি তুমি?’

নীল মিয়া বলল, ‘একবার মা।’

‘একবার! কী করবি তুমি? কী করবি তুমি? ওরে আল্লাহ রে! ও আল্লাহ!’

‘চিল্লাইস না মা! কান্দিস না, শোন।’

চুপ করে গেল সাকিনা।

নীল মিয়া বুঝি শব্দ হিসাব করে বলল, ‘আমি চান্দেদের ঘর সিঁদ দিব মা।’

‘চান্দেদের ঘরে?’

‘হ। ঈদের চান চুরি করে আনব।’

এবার সহজ হলো সাকিনা। পাগল ছেলে তার। চাঁদ চুরি করবে। তাও
ঈদের চাঁদ। কী করবে?

চুরি করা ঈদের চাঁদ তার মায়ের চোখে লুকিয়ে রেখে দেবে নীল মিয়া।
সব মানুষ, সব পোলাপান তার মায়ের চোখে ঈদের চাঁদ দেখবে। হুন্না
করবে, আসমানে লুকা ছুড়বে আগুনের।

নীল মিয়া চোর হয় নাই। সিঁদকাঠি নেয় নাই। কষ্টেছিঁস্টে লেখাপড়া শিখে বিএ
পাস করে পিটিআই ট্রেনিং নিয়ে সরকারি প্রাথমিক বিদ্যালয়ের শিক্ষক হয়েছে।
সব ঈদের চাঁদ এখনও তার অন্ধ মা সাকিনার চোখে দেখে সে।

জিলাফ কী মানুষ?

এই, আয়! আমি বললাম।

সে কোনও কথা বলল না। যে দৃষ্টিতে আমাকে দেখল, এটাকেই বলে
বোধ হয় ‘সন্দিক্ত সতর্ক দৃষ্টি।’ আমি আবার ডাকলাম, ‘এই।’

সে এবারও কিছু বলল না। নিরাপদ দূরত্বে থেকে আমাকে জরিপ করতে
থাকল। হাবভাব দেখে মনে হতে পারে, সে আমাকে হয়তো ভয় পায়।
বাস্তবে ঘটনা তার উল্টো। ভয় পায় না। এই মুহূর্তে কোনো কারণে হয়তো
বিশ্বাস রাখতে পারছে না। কেন আমি কি করে বলব! বলতে কি, বাচ্চাদের
জগৎটাই বিচিত্র-আমি ভাবলাম, এদের বিশ্বাসের জগৎ যে রকম অদ্ভুত,
অবিশ্বাসের জগৎও সেই রকম। অদ্ভুত আর যুক্তিহীন। কোনটা কেন, কিছু
ঠিক নেই। ভাবলাম, পরে একটা দীর্ঘশ্বাস ফেলে নিতে হবে, ইস, আমিও
একদিন এই আশ্চর্য জগতের বাসিন্দা ছিলাম!

সে দাঁড়িয়েছিল টেবিলের কোণটায়। সিমেন্টের একটা ছোট টেবিল আর
কয়টা বেঞ্চ আছে এই ছাদে। আমি আরাম করে পা উঠিয়ে গুটিয়ে
বসেছিলাম একটা বেঞ্চিতে, আর একটা সিগারেট টানছিলাম। একটু আগে
আমার প্ররোচনায়ই সে ছাদে উঠে এসেছে। কিছুক্ষণ সব ঠিকঠাকও
চলছিল। তারপরই এই বিচিত্র আচরণ! মনে হলো ভুলে গেছে সে। আমাকে
তার শত্রুপক্ষ ভাবছে, যার কিনা কোনো মানেই হয় না। বলে না, বাচ্চাদের
জগৎটাই অদ্ভুত! আমি একটু উদাস ভাব করলাম, আর আনমনা গলা করে
বললাম, ‘গুটটু মিঞা নাকি কাকে ধরে পেটায়?’

গুটটু মিঞা হচ্ছে এই বিল্ডিংয়ের চারতলা নিবাসী শয়তান। এর থেকে
দেড় বছরের বড়ো। সেই সুবাদে ‘গুতলুভাইয়া’। মহাভাব দুই জনের মধ্যে।
গুতলু ভাইয়া কাকে ধরে পেটায়, ইঙ্গিতটা সে ঠিকই বুঝল। সব ভুলেটুলে
প্রতিবাদও করল, ‘না।’ গুতলুভাইয়া পেতায় না।

‘সত্যি পেটায় না?’ আমি বললাম।